

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst (“Službene novine Zeničko-dobojskog kantona”, broj: 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 177. sjednici, održanoj dana 05.02.2019. godine, d o n o s i

ZAKLJUČAK

I.

Prihvata se Mišljenje Ministarstva za poljoprivredu, šumarstvo i vodoprivredu po prijedlozima Kluba vijećnika DF Vareš pod rednim brojem 5. i 11. od 05.12.2018. godine za Program rada Skupštine Zeničko-dobojskog kantona za 2019. godinu i čini sastavni dio ovog Zaključka.

II.

Zaključak stupa na snagu danom donošenja.

Broj: 02-_____/19.
Datum, 05.02.2019. godine
Zenica

PREMIJER

Miralem Galijašević

DOSTAVLJENO:

1x Ministarstvo za poljoprivredu, šumarstvo i vodoprivredu,
1x Stručna služba Skupštine,
1x a/a.



Broj: 05-1-34-15965-1/18
Zenica, 21.12.2018. godine

Stručna služba Vlade Zeničko-dobojskog kantona je aktom broj: 02-1-34-15965-17/18 od 14.12.2018. godine, zatražila od Ministarstva za poljoprivredu, šumarstvo i vodoprivredu da iz svoje nadležnosti pripremi akt za sjednicu Vlade o prijedlozima Općinskog načelnika, Općinskog vijeća i Kluba vijećnika DF u Općinskom vijeću općine Vareš za Program rada Skupštine Zeničko-dobojskog kantona za 2019. godinu, o čemu Ministarstvo za poljoprivredu, šumarstvo i vodoprivredu daje slijedeće:

MIŠLJENJE

U vezi sa prijedlogom Kluba vijećnika DF u Općinskom vijeću općine Vareš iz tačke 5. koja glasi „*Ažurirati vodozaštitne zone, evidentirati njihove lokacije i granice, propisima zabraniti sječu u vodozaštitnim zonama. Na taj način poboljšao bi se i kvalitet vode za piće, te zaštitilo zdravlje građana.*“, ističemo da je obaveza zaštite voda propisana Zakonom o vodama („Službene novine Federacije BiH“, broj: 70/06), a uslovi o načinu određivanja zona sanitarne zaštite za izvorišta koja se mogu koristiti ili se koriste za javno snabdijevanje stanovništva, odnosno za ljudsku upotrebu, mjere zaštite u tim zonama i postupak za donošenje odluke o zaštiti izvorišta propisani su Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine Federacije BiH“, broj: 88/12).

U članu 11. citiranog Pravilnika je utvrđeno da je općinski organ uprave naležan za vode na čijem području se nalazi izvorište dužan, na prijedlog operatora vodovodnog sistema ili samostalno, organizovati izradu i reviziju elaborata zaštite izvorišta, organizovati provođenje javne rasprave i uputiti prijedlog odluke nadležnom organu na donošenje. Pored toga, u članu 15. je utvrđeno da je do donošenja odluke o zaštiti izvorišta, općinski organ uprave naležan za vode na čijem području se nalazi izvorište, dužan izvršiti privremenu zaštitu izvorišta u radijusu ne manjem od 50 m od postojećeg vodozahvata i odrediti pravno lice koje će uspostaviti i minimalno jednom mjesečno provoditi odgovarajući monitoring kvaliteta vode na izvorištu. U prilogu Pravilnika dat je popis aktivnosti i nivo ograničenja pojedinih aktivnosti u zaštitnim zonama, odnosno koje aktivnosti su zabranjene, koje su dopuštene i one koje su dopuštene uz standardne ili dodatne mjere zaštite.

Iz navedenog je vidljivo da je „ažuriranje vodozaštitnih zona“, odnosno usklađivanje sa citiranim Pravilnikom obaveza općine na čijem području se nalazi izvorište, odnosno privremena zaštita i pokretanje postupka donošenja odluka o zonama sanitarne zaštite za izvorišta za koja nisu donosene odluke, iz čega proizilazi da je u kontekstu zaštite zdravlja stanovništva, od posebne važnosti dosljedno provođenje i inspeksijska kontrola provođenja utvrđenih mjera zaštite.

U skladu sa citiranim propisima, Vlada Kantona donijela je određeni broj Odluka o zonama sanitarne zaštite izvorišta čije zone se prostiru na području više općina u sastavu Kantona, koje su objavljene u Službenim novinama Zeničko-dobojskog kantona.

Iako je upravni nadzor nad provođenjem ovog propisa u nadležnosti Federalnog ministarstva poljoprivrede, vodoprivrede i šumarstva, jer se radi o federalnom podzakonskom propisu, ovo Ministarstvo je aktom broj: 05-25-9844/17 od 30.06.2017. godine podsjetilo sve općine Kantona na obavezu usklađivanja postojećih odluka o zaštiti izvorišta pitke vode sa važećim Pravilnikom.

U vezi sa prijedlogom Kluba vijećnika DF u Općinskom vijeću općine Vareš iz tačke 11. koja glasi: „Analizirati uticaje mini hidro-centrala na okoliš, te na iskustvima dosadašnjih centrala poštivati proceduru davanja saglasnosti i njihovog potpunog ukidanja“, ističemo da je ovo Ministarstvo u postupcima koji su prethodili dodjeli koncesija za male hidroelektrane iz nadležnosti Kantona, dosljedno provodilo zakonske propise, uključujući prije svega pribavljanje saglasnosti lokalne zajednice, odnosno općinskih vijeća općine na čijem području se nalazi predmet koncesije u skladu sa članom 1. Zakona o dopunama zakona o koncesijama („Službene novine Federacije BiH“, broj: 61/06) i članovima 8. i 56. Zakona o principima lokalne samouprave („Službene novine Federacije BiH“, broj: 49/06), po kojima Općinsko Vijeće ima nadležnost da vrši politiku upravljanja prirodnim resursima i raspodjelu sredstava ostvarenih na osnovu njihovog korištenja na teritoriji koja je definisana općinskim granicama. Pored toga, posebno ističemo da je prema odredbama Zakona o koncesijama obavezni sastavni dio Studije o ekonomskoj opravdanosti dodjele koncesije procjena u cilju zaštite okoliša, kako je to utvrđeno u članu 7. Zakona o koncesijama (Prečišćeni tekst) /“Službene novine Zeničko-dobojskog kantona“, broj: 5/03). Nejasno je šta se ovim prijedlogom traži da se „potpuno ukine“? Mišljenja smo da prijedlog nije dovoljno jasan i da se u ovom kontekstu eventualno može tražiti izmjena važećih propisa, na način i po postupku kako je to regulisano zakonskom procedurom.

Obradivač akta:

Senada Dizdar

MINISTAR

Himzo Smajić



Bosna i Hercegovina, Zenica, Kučukovići br. 2
Telefon: 032/460-750 i 460-751; Fax: 032/460 – 752
e-mail: min.poljoprivreda@zdk.ba
www.zdk.ba